

重刊道藏輯要

參同契

中篇 上卷御政計四章此乃中之上也

上篇十五章分御政養性伏食三卷應藥物爐鼎火候三要金丹大道已無餘蘊然但舉其體統該括處尚有細微作用未及悉究恐學者不察流入差別門庭故此篇仍分三卷將差別處逐段剖析與上篇處處表裏相應近代諸家有分上篇為經此篇為注者又有分四言為經五言為注者不知徹首徹尾貫通三篇始成一部參同契千載之下孰從定其為經為注而徒破碎章句乎俱係臆說槩所不取

道藏輯要

參同契

一

虛集二
川文三

此卷專言御政而養性伏食已寓其中義同上篇

四象環中章第十六

乾剛坤柔配合相包陽稟陰受雌雄相須須以造化精炁乃舒坎離冠首光曜垂敷玄冥難測不可畫圖聖人揆度參序元基四者混沌徑入虛無六十卦周張布為輿龍馬就駕明君御時和則隨從路平不邪邪道險阻傾危國家

此章言乾坤坎離自相造化明先天環中之妙也

乾剛坤柔配合相包陽稟陰受雌雄相須須以造化精炁乃舒此節言乾坤為坎離之體也蓋乾坤者易之門戶實坎離之所自出乾元為天地之始坤元為萬物之母乾動而直其體